

# Lia Rumantscha deplorescha decisiun da l'Institut Otalpin

Reacziuns sin la decisiun da l'Institut Otalpin Ftan da stritgar l'obligatori da rumantsch

■ (rtr) La decisiun da l'Institut Otalpin Ftan d'introducir ina matura bilingua englais-tudestga e da persuerter stritgar l'obligatori da rumantsch a partir da la terza classa vegn deplorada e criticada. La regenza grischuna ha dà glisch verda a l'Institut Otalpin Ftan per introducir la matura englais-tudestga a partir dal 2019/20. Rumantsch pon ils gimnasiasts u pigliar sco segunda lingua naziunala u sco rom facultativ. Cun quest pass less l'institut sa posiziunar da nov e promover l'englais ch'è ozendi savens standard en universitads svizras, uschia la direcziun.

Uschia na datti en naginas scolas medias grischunas pli in obligatori da rumantsch. Tut las scolaras ed ils scolars che vegnan da scolas rumantschas pon eger sezs tge matura ch'els vulan far. Ma tuttina porschan differentas scolas grischunas anc roms rumantschs. Tgi pli bler e tgi pli pauc. Tenor il manader da l'Uffizi chantunal per la furmaziun media-superiura *Hans Peter Märchy* saja quai dentant fitg individual quant e tge roms che vegnian instruids per rumantsch. Tenor *Martin Jäger*, cusseglier



Il pledader da la Lia Rumantscha **Andreas Gabriel** deplorescha la decisiun da l'Institut Otalpin a Ftan.

MAD

gubernativ, haja la regenza dà quella lubientscha cunquai che las scolas medias privatas san decider sezzas co ellas vulan sa posiziunar, uschè ditg ch'ellas sa tegnan vi da las regulaziuns. Uschia n'haja la regenza gnanc la basa legala da far insatge encunter e pretender che l'Institut Otalpin Ftan stoppia mantegnair l'obligatori da rumantsch. Quai saja la libertad che las scolas medias privatas hajan sin il martgà liber.

## Lia Rumantscha deplorescha la decisiun

*Andreas Gabriel*, pledader da la Lia Rumantscha (LR), deplorescha la decisiun da l'Institut Otalpin Ftan. El ha dentant chapientscha che l'institut sto per l'avegnir era carmalar scolaras e scolars internaziunals, quai na duai dentant betg capitar sin donn e cust dal rumantsch.

En il rom da la consultaziun per la revisiun totala da la lescha davart las scolas medias propona la LR dad obligar ina scola media en mintga regiun da porscher la maturitad bilingua grischuna. La decisiun da Ftan cumprovia l'urgenza d'ina tala determinaziun che protegia il

rumantsch, manegia *Gabriel*, il pledader da la LR.

## Rico Valär na chapescha betg la decisiun

*Rico Valär* ch'è a partir da l'avust nov professor da rumantsch a l'Universitad da Turitg crititgescha la decisiun dal chantun da laschar abolir l'Institut Otalpin Ftan l'obligatori da rumantsch. Quai saja fitg problematic pertge gia uss manchian scolaras e scolaras rumantschs en las scolas. Uschia perdia il rumantsch sia rolla en las scolas grischunas.

Er per ils studis da rumantsch saja quai problematic sch'il rumantsch vegnia abolì en tschertas scolas medias. Pertge la gronda part da las studentas e dals students che fan in studi da rumantsch derivian or da questas scolas. Pli paucs students da rumantsch saja dentant il pli pitschen problem. Per *Valär* è la consequenza la pli gravanta quella ch'i dat adina pli paucs scolaras rumantschs sin stgallim primar e superiur. Uss saja quai da spetgar giu las reacziuns e lura tschertgar il discurs cun las scolas medias ed er il chantun.